

recht vnd ohne Schaden könne schmelzen / vnd auff dem Test abtreiben: das Silber vom Gold abzuschneiden / vnd endlich allerhand gleiche oder erhabene Arbeit mit Vorthail in Sand / oder in Span zu giessen.

Weiter gehöret auch dieses hierzu / daß sie das Gold vnd das Silber wissen zu reinigen / wol zu ferben / vnd ihm einen schönen Glantz zu geben: Item / w. in sie die edele Steine wol kennen / dieselbige beydes in Gold / vnd in alle andere Metallen wissen zu versetzen. Item / daß sie mit Vorthail / Silber / Kupffer / Zinn / vnd andere Metallen wissen zu vbergulden: Item / ihre Arbeit / sie sey gleich erhaben / oder hohl / mit dem Eisen wol zu bestechen / vnd zu zieren.

Ihren Verstande nimbt man dabey ab / wenn sie das Gold recht wissen zu leutern. Solches aber geschicht auff dem Test / welcher von Hornaschen wird auff einander geschlagen / vnd darnach in einer irrdinen Form / in ein Kohlfewer gesetzt / bis er ganz glüend wird / alsdenn thut man ein wenig Bley dar / ein nach Gelegenheit vnd Quantitet des Silbers oder Goldts / so man leutern will / wenn dasselbige geschmolzen / so leget man das Gold oder Silber darauff / decket es wol mit Kohlen / vnd bläset allgemach zu / bis die Materia, so auff dem Test ist / anfangt herum zu fließen. Wenn dieselbige nun auffhöret / vnd stillstehet / daß man sie hell siehet blicken / alsdann ist die Leutering geschehen / vnd ganz vollbracht.

Sie beweisen auch hiemit ihre Kunst / daß / wann die auff dem Test geleuterte Materia von Silber vnd Gold vnder einander vermischet ist / sie die mit gutem Verstand wissen von einander zu scheiden. Solches aber geschieht auff nachfolgende Weise. Man schläget die geleuterte Materiam zu dünne Blech / vñ wirfft dasselbige in Scheidwasser / welches

die Alchimisten von Salpeter vnd Berg Alaun machen / darinn werden also bald gemeldte dünne Blech verzehret / vnd wird das Wasser grün / da sich das Gold in einem röthlichten Gries vnden auff den Boden setzet. Das grüne Wasser geust man davon ab / setzet es in einen Kolben / den Helm darüber / vnd treibet es also mit Feuer ab / bis daß alles in den Recipienten gestiegen / so findet man einen weisen Todtenkopff vnden in dem Kolben / welches das reine Silber ist / dasselbige lest man in einem Tiegel zergehen / vnd wirfft ein wenig Salarmoniac darauff / damit es wol ge-



reiniget werde. Vnd muß man sich wol fürsehen / daß man kein Sublimatum, an statt des Salarmoniacs brauche: dann wo dasselbige das Silber berühret / so thut es ihm mächtigen Schaden. Mit dem abgeschiedenen Gold gehet